

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IUNI 2019

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

Fono Tele Malua 2019

“FAAALIGA O LE MANA O LE SILISIILESE”



(Revealing the Power of the Most High)

(Tanielu 7:18)

(silasila itulau 4-7)



Afioga i le Faletua ia Olita Tautiaga Senara, Susuga i le Teutupe Rev. Rimoni Wright (FS), le Susuga i le Toeaina ua Penisione Malolo - Tautiaga Senara (FT), Susuga i le Ta'ita'ifono Ekalesia Aoao - Susuga Tunumoso Soliola Iosia (FT), Susuga Sui Ta'ita'ifono - Susuga Iosefa Atapana Uilelea (FT), Susuga i le Toeaina ua Penisione Malolo - Susuga Tanielu Mamea (FT) ma le Faletua ia Susana Tunumoso Iosia.

FAASINO UPU

1.	FAASINO UPU			2
2.	LAUGA (Saunia: I Panapa Fata To'o FS)	2	-	3
3.	PEPA FONOTELE 2019 (Saunia : Faauuga Mata'utia (FT))	4	-	7
4.	O LE TALITONU KERISIANO			7
5.	FETU'UTU'UNA'IMUNIAO (Keneti Leaupepetele FS)	8	-	9
6.	ARETO MO LE AGAGA (Iosefa A. Uilelea FT)			10
7.	LISI O A'OA'OMA O LATOU FALETUA UA FAAUUINA I LE TOFI FAIFEAU (FS)			11
8.	ITULAUMO TUPULAGA (Saunia: Solomona Tuatagaloa FT)	12	-	13
9.	ARETO MO LE FANAU	13	-	14
10.	O E UA FAI I LAGILE FOLAUGA	15	-	16

1. Mataolooa Pepe Manu Lemalu
2. Seu Stewart Baker

O LE LAUGA

Tusi Faitau: Luka 15: 32
“Ua tatau foi ona tatou fiafia ma olioli, auā o lou uso lena na oti, a ua ola mai, na le iloa foi a ua maua”

Manatu Autu: O LE FIAFIA UA LE ATOA I TOTONU O LEAIGA.

Peiseai tasi lea sini autu o le soifuaga o lo outou soifua ma tatou ola ai.

➤ O le sailiga o le fiafia poo fea tonu e maua ai

➤ O le sailiga ole ola faamalieina poo fea o atoatoa ai

➤ Atonu o le mafuaaga lea na faamavae faafuasei ai le uii i lona tamā ma lona aiga.

➤ Ua ia manatu e le maua i lona aiga le atoatoa o lona fiafia.

• Ona vaeluaina lea ia te ia o ana mea e lona tamā. Ua alu. Ua motusia le mafutaga faale-aiga mo aso e tele.

• Ua o'o atu o ia i nu'u mamao e tusa ai ma le tala.

➤ O nu'uese, o aiga ese ma tagata ese. Ua maua ana uo, ua faa-aiga foi i tagata latou te le masani, ona o le Tamaoaiga sa ia te ia. Ua so'ona ulavale!- E le o taua i le Tala po'o le faataoto pe na fiafia ma faamalieina o ia.

➤ Pau le mea o lo'o faamamafaina ma taua. Na uma loa ana mea-mativa loa. O le olaga na te lei iloa muamua. E lei o'o iai lona olaga, a'o ola i totonu o le lio

O LE LAUGA

faale-aiga. Ona alu lea ua nofo i le isi tamaloa o lea nuu, ma fai ai o ia ma fagapua'a.

- Ua a'oa'oina i tatou i lenei vaega o le faataoto e faapea. O le fia alu ese mai i le aiga e saili le fiafia ma le ola faamalieina ua le atoa i totonu o le aiga.

➤ E taunuu lava i se taunuu faanoanoa ma le faalumaina aemaise e leai lava se tasi e alofa i le aluese mai le aiga.

➤ Peita'i ua vave atamai o ia. Ona toe foi lea i le aiga. Ia, ua tatou malamalama i le tala i le fiafia ua oo isi toeaina ina ua toe foi atu le atalii. O le tamā na leiloa i fafo atu o le aiga a ua toe maua. Na oti a ua toe ola mai. Ona fai ai lea e le tamā o le fiafia tele ma ana uo, ona o si ona atalii ua toe foi mai.

- Ua oo mai le ulumatua sa i le vao. O le isi foi vaega taua ole olaga faale-aiga, ua tatou iloa i le taunuu mai o le ulumatua. Fai mai ua taunuu mai o ia, ua faalogo i le laaupese ua ta ma sisiva. Ona fesili lea o ia i le tasi auauna poo le a le uiga o lea mea. A ua fai mai le auauna ia te ia, ua sau lou uso, na fasi ai foi e lou tamā le tama'i povi peti, ina ua o'o mai o ia o ola.

- Ona ita ai lea o ia- ua le mafai ona ulufale iai. Ona sau lea i fafo o si ona tamā ua faaoleole ia te ia.

- E faaoleole atu e le tamā ae fai mai le ulumatua, o tausiga e tele na ou auauna ai ia te oe, e leai

foi sau poloaiga ua ou solia, ae e te lei aumai lava se tama'i oti matou te fiafia ai ma au. Ao lou atalii lena, sa na faaumatia au mea faatasi ma fafine talitane, ua sau o ia ona e fasi lea o le tama'i povi peti mana.

- Malolosi tele ia upu! Pe a fuafua atu i le va faamātua ma fanau, le va fa'aatalii i lona tamā. Peita'i o le alofa faapalepale o le tamā e uigaese, fai mai ana upu i lona atalii ulumatua. Ta e, ta te nonofo pea ma oe, o au mea uma foi o au ia.

- Faapea lava tatou, na o le uii na faaletonu lona olaga, ia le fia alu ese mai le aiga, ae ua tatou iloa nei e tele foi faaletonu o le uso ulumatua. E ui lava ina sa iai pea o ia i le aiga. Ma tautua lona tamā, ae eleelea lona loto, sa galue o ia ma faatitilo i se tau. O se auauna na fai toa'i o se tautua ua ai ma le foa ai.

- Lea ua mapuga ae lea tulaga ina ua tau mai o fai le fiafia e lona tamā ma le uso laititi. Ma ua faapea atu isi toeaina. E te fai tama faapito, o lou atalii lena sa ta'a. Sa faamaumau au mea totino ao lena ua maumau ai le tama'i povi. O le upu moni, e te iloa i le gagana a le uso ulumatua o loo leiloa foi o ia i totonu lava o lona aiga i tafatafa ane o si ona tamā.

- Na aveesea e le uii meatotino a lona tamā.

- Na aveesea e le ulumatua le fiafia o lona tamā.

- E mafai ona toe faatumu ma toe maua mea totino po'o le tamaoaiga. Ae faigata tele ona toe maua le fiafia ua aveesea ma le atoa.

- Na fiafia si toeaina ina ua toe foi mai le uii, ae ua toe seu e le ulumatua.

Le paia o le Ekalesia. O tafa matautia ia o le olaga o loo tele ai aiga o loo ola faasetusetu ona o loo leiloloa pea ona tagata i totonu ma fafo ane o le aiga.

O le upu moni le Ekalesia, o le ata o le aiga o le tama ma ona atalii e toalua, le uii ma le ulumatua, ma le mea ua tupu ai. O le mea moni lava o loo tupu i le tele o tatou aiga ma le Ekalesia.

O loo fefaaloai ai pea le fia aluese ma le nofo toai. O lo o fetuleiai ai pea le fevaavaiaia ma le faatautala. Faatoa paleni lava mea uma, ma maua atoa lou fiafia i le olaga faaleaiga, faale Ekalesia pe a tatou maua uma le agaga sa i le tama. O le a lea? E faapalepale, onosai, loto faamagalalo, e alofa pea. Amene.

Saunia:

I. Panata Fata Too (FS)

EFKS Sasina

Matagaluega Ituotane

PEPA FONOTELE MALUA 2019

“Faaaliga o le Mana o le Silisiliese”

Revealing the Power of the Most High

“FAAALIGA O LE MANA O LE SILISILIESE”

REVEALING THE POWER OF THE MOST HIGH

“Faauta mai, ua afio ane le Alii; o le matagi tetele fo’i ma le malosi ua lepetia ai mauga, ma momomo ai papa i luma o le Alii; e le’i iai le Alii i le matagi; ua mulimuli i le matagi o le mafui’e; e le’i iai le Alii i le mafui’e; e mulimuli i le mafui’e o le afi; e le’i iai le Alii i le afi; e mulimuli i le afi o le leo filemu ma le itiiti.”

UPU FAAFEILOA’I:

I lo’u agaga faaaloalo ou te faatalofa atu ai i le Pa’ia o le Ekalesia i le e’e mai o lau Afioga i le Ta’ita’ifono ma le mamalu o le laulau a fonu o le Fonotele. Le Paia o le nofo a Komiti e fia ma usufono ta’itasi mai le Nofo a Matagaluega, tainane usugafono faapitoa mai nisi o vaega ma magāvai e fia o le Ekalesia, i usugafono a le mafutaga a Tinā, o sui mamalu mai le Aulotu i Fiti ma Iuresalema Fou, Susuga i le Alii Pule ma le Kolisi i Malua, faapea le Ofisa o Autalavou i lau Susuga i le Faatonu ma alo talavou o le Ekalesia ua usufono mai. E le faagaloina le tapuaiga a tamā ma tinā penisione ua mapu ane mai le galuega ae le tapuaiga a le

Ekalesia Aoa o auā leni Fonotele. Malo le soifua ma le lagi e mama.

Ua te’a le viiga i le Atua e tusa ma le tapuaiga sa fitaituga ai le Tamā malolo. Tau ia ina ia togi pa tau i le ave i le faafofoga a lo tatou tapanu i le lagi. Ae o le a taumafai atu ia le Toeaina mai le Matagaluega a Faleata, e fai ma sui o le Komiti a Tamā o le Ekalesia i le itupa o Faifeau auā se sao mo leni Fonotele. Ou te faamauina ai le faafetai i le laulau a le Fonotele ma le Laulau a le Komiti a le Au Toeaina ona ua amanaia sou vaivai e fai se aoga mo leni faamoemoe.

AUTU: FAAALIGA O LE MANA O LE SILISILIESE / REVEALING THE POWER OF THE MOST HIGH

1Tupu 19: 11 & 12

“Faauta mai, ua afio ane le Alii; o le matagi tetele fo’i ma le malosi ua lepeti ai mauga, ma momomo ai papa i luma o le Alii; e le’i iai le Alii i le matagi; ua mulimuli i le matagi o le mafui’e; e le’i iai le Alii i le mafui’e; e mulimuli i le mafui’e o le afi; e lei iai le Alii i le afi; e mulimuli i le afi o le leo filemu ma le itiiti.”

FAATOMUAGA

O faaaliga o le mana o le Atua, o mea ia ua tino mai ai lona malosi ma lona mata’utia. O mea e gata ia te ia ma lona silisiliese. Atalanoa i faaaliga o le mana silisiliese o le Atua, pei e faigofie ona tosina o tatou mafaufau i ni mea tetele ma le mata’utia, e matuā ofo ai. Pei o le la’au talatala na iloa e Mose, ua mu ae le faaumatia; poo le faaaliga na iloa e Isaraelu i le soloia o pa o Ieriko, na faaumatia ai lea aai i le na’o na ili e Isaraelu o pu ma savavali faataamilo i le aai; poo le faaaliga foi na iloa e Aapo ma perofeta a Paala, ina ua pa’u ifo le afi mai le lagi ma faamuina ai le taulaga a Elia. E anoanoai faaaliga matautia ole mana o le Atua ile Tusi Pa’ia. O mea e le mafai e se malosi o le tagata, ae na’o le mana o le Atua. O mea tetele e faigata i le mafaufau o le tagata ona faavasega. Ua filifilia le faaaliga na iloa e Elia i le ana i le mauga o Horepa e fai iai sina saililiga ma le faamoemoe maualuga, ina ia saga faatamaoaigna ai i tatou i uiga loloto o ia afioga a le Atua. O le sini o loo taula’i, se’i va’ili poo le a se tāua o leni faaaliga mo le Ekalesia i nei aso.

1. ILOILOGA I LE GAGANA:

(faaauau itulau 5)

PEPA FONOTELE MALUA 2019

“Faaaliga o le Mana o le Silisiliese” *Revealing the Power of the Most High*

O le matagi, mafui’e ma le afi, o nisi nei o mea faafefe tagata i le lalolagi. E tele soifua ua fano ai, ma toetoe a aso uma o tutupu ai i vaega eseese o le kelope. O nei mea, o ni mea tetele ma le ogaoga i le mafaufau o le tagata soifua, ma o loo faaogaina foi e le Atua i nisi faaliga o lona silisiliese i le Tusi Paia.

a). Matagi – O le upu ua faaliliuina ‘matagi’ iinei, ole upu **we-ru’ah** (וֶרֶחַ). O le upu fo’i lenei o loo faaogaina e le tusitala o Kenese i lana tala o le foafoaga (Kenese 1:2), ae faaliliuina i le ‘Agaga o le Atua.’ “...na fegaoioiai foi *le Agaga o le Atua* i le fogatai.”

e). Mafuie – O le upu **ra-as** (רֵעַ). O le upu fo’i lenei o loo faamatalaina ai e Isaia le sala o le a oo iā Isaraelu ona o a latou agasala (Isaia 29:6). “E asiasia oe e le Alii o au i le faititili, *ma le mafui’e*, ma le taalili tele; o le asiosio ma le afā, ma le mumu o le afi e faaumatia ai.”

i). Afi – Ua faaliliuina mai le upu ‘es’ (אֵשׁ). Ma o le upu foi lenei o loo faamatalaina ai le afi na faaumatia ai le fanau lepopoi a Arona, o Natapu ma Aviu (Levitiko 10:2). “Ona alu ane ai lea *o le afi* mai luma o le Alii, ua mu ai i la’ua, ona la oti lea i luma o le Alii.”

o). Leo filemu ma le itiiti – O le nauna, **qol** (קוֹל) ua faa-Samoaina o le leo, ua faaperetaniaina o le voice, noise, sound. Ua le na’o se leo o faaleo mai ai ni upu poo se tautalaga, ae mafai fo’i ona faamatala ai leo eseese e lagonaina pe le lagonaina fo’i. Ae ua faamatalaina atili le leo iinei, e le **demamah** (דַּמָּמָה) poo le musumus, lea ua liliu i le *filemu*; ma le **daq-qah** (דַּק־קָה) poo le nini’i, ua faaliliuina i le *itiiti*.

E leai se isi vaega i le Tusi Pa’ia o faaogaina ai le tuufaatasiga o nei upu e tolu, ua na’o le faaaliga lenei ia Elia. Ae o le mea ua manino i lenei iloiloga pu’upu’u, e pule lava le Atua i ala e faaali mai ai. Ua le na’o se leo filemu e pai malu mai, pei ona manatu ai nisi. E eseese ala e faaali mai ai le Atua, ma e le mafai fo’i ona atoa iai se iloa o le tagata pe aiseā. Afai o le matagi, o le matagi lava; afai o le mafui’e, o lena, afai o le afi, e faapena foi; afai o le leo filemu ma le itiiti, o lena lava.

2. O LE IAI MA LE LE IAI O LE ATUA.

E le o manino i’u o le faaaliga na iloa e Elia. O loo iai le mautinoa i le faasologa o mea matautia na muamua mai, “...e lei iai le Atua...” Peita’i ina ua oo mai le

leo filemu ma le itiiti, ona faaselemutu ai lea o upu a le tusitala. Ua le faapea mai, “e le’i iai le Atua...” pe faapea mai foi, “...sa iai le Atua...” Ma ua tu’ulafoai mai faapea e faitalia le tagata faitau ma faavasega.

Ua mafuli finagalo o tagata su’esu’e, mo lenei lava faaaliga, ua filifilia e le Atua le leo filemu ma le itiiti e faaali mai ai lona mamalu i lana perofeta. Talu ai ona o le faaselemutu o le tala i lona faamatalaina, ua manatu ai le toatele o e su’esu’e i le Tusi Paia, sa iai le Atua i le leo filemu male itiiti ae lei iai le matagi, le mafui’e ma le afi. E mautinoa, ua lolo mafaufauga i se faaiuga faapea ona o le fuaitau “...e le’i iai le Atua...”, aemaise la gaioiga a Elia o loo mulimuli mai i le leo filemu ma le itiiti; faimai “Ua faalogo ai Elia, ona ufiufi ai lea e ia o ona mata i lona ofutele, ma alu i fafo...” Peisea’i e faigofie ona tatou manatu, ua ufiufi mata o Elia ona ua ia iloa ua iai le Atua i le leo filemu ma le itiiti. Peita’i e iai fo’i itu e faigatā ai ona talia lea manatu.

a. Muamua, e mulimuli ona oo mai le leo filemu ma le itiiti ae ua leva ona fesaga’i Elia ma le Atua. O le atoaga lea o le faaaliga. O le fesagaiga na amatamea ai le Alii.

(faaauau itulau 6)

PEPA FONOTELE MALUA 2019

“Faaaliga o le Mana o le Silisiliese” Revealing the Power of the Most High

E iai le talanoaga lea o loo i le fuaiupu e 9 seia oo i le 11.

e. Lonalua, e le o faapea mai le tusitala sa iai le Atua i le leo filemu ma le itiiti. Pei lava ona ta’ua, o loo faaselemutu le faamatalaga, ma e faigata foi ona faaopopo se isi upu i le taatiaga ua iai.

3. O LE ALE LEO FILEMU MA LE ITIITI?

O le leo filemu ma le itiiti pe a toe silasila i le iloiloga o le gagana, o le leo o le musumusuni nini’i. O le upu *demamah* ua faaliliuina i le filemu, o le upu fo’i lea e tasi o loo faaaogaina i le Iopu 4:16, a’o loo faaliliuina o le “ligoligo” poo le *silence* i le faaperetania. O se tasi ona faaliliuga sili ona ma’ati, o le upu *sāō/muteness*.

O le upu **daq-qah** ua faaliliuina i le itiiti, o le upu foi lea e tasi o loo faaaogaina i le Levitiko 16:12, ao loo faaliliuina o le “tu’inini’ia” poo le *finely ground* i le faaperetania. O mea nini’i mai se tuigamea, ua salalau ma taape solo.

Lona uiga i ni upu tu’usa’o, o le leo ole *sāō* nini’i, le leo na faalogoina e Elia. O le pau ma le taaligoligoa e lia ai le tino. E le o se leo o se musumusuni mai le Atua pei ona manatu ai nisi, ae o le filemu taaligoligoa e aunoa ma se mea e *gāsē*.

4. AOTELEGA O MANATU:

O le mea ua mautinoa, o le faaliga na iloa e Elia, e le o se faaataataga lea ole mea ua finagalo le Atua e fai iā Isaraelu. Afai e faitauina faapea, ona foliga lea ua le finagalo le Atua e tali atu i lona matautia le agasala tele a lona nu’u, ae tali atu i se leo filemu. Peita’i, e le fealofani le leo filemu ma le itiiti ma le mea ua sauni le Atua e fai ia Isaraelu. O le sasa e ogaoga ma matautia. Lea e iai lana fetalaiga o loo faamauiina i fuaiupu 15, 16 & 17:

- *“Ina alu ia oe ma toe foi i lou ala i le vao o Tamaseko; pe a a oo foi iai, ia e faauiina Asaeli e fai ma tupu o Suria; ma Leu le atalii o Nimese, e te faauiina e fai ma tupu ia Isaraelu; ma Elisaia le atalii o Safata o le Apelemeola. E te faauiina e fai ma perofeta e sui a’i oe. O se sao i le pelu a Asaeli, e fasiotia lea e leu; o se sao i le pelu a leu, e fasiotia lea e Elisaia.”*

- E leai se isi na si’i ai le pelu a Elisaia, ao lana upu, o le pelu lea na ia valo’ia ai tigā e oo i le nuu o le Atua ona o a latou amio leaga.

O leu, o ia lea na fasiotia Iesepela ma le aiga uma o Aapo e oo i lona atalii na la sosoo i le nofoalii o Ioramo (2 Tupu 9).

O Asaeli na iloga ona ila Isaraelu i lana fasi. O le upu a Elisaia le perofeta na fai ia Asaeli ina ua la fetai’i ae lei faia o ia ma Tupu, ua lava lea e aotele ai le matautia o le fasi a Asaeli.

- *“Auā ua ou iloa le leaga e te faia i le fanauga a Isaraelu; e te susunu i o latou olo i le afi, e te fasi i o latou taulele’a i le pelu, e te palasi i a latou tama meamea, e te faatiau i o latou fafine toto.”*

A fua i mea ua maua i lenei sailiiliga, e foliga o se feau lava mo Elia ina ia faamalosi i le galuega. Ua tauau ina si’i lila le perofeta, ona ua manatu ua toe o ia le perofeta a le Atua. Pe ai foi ua manatu Elia ua le manatu mai le Alii ia te ia i taimi o ona mafatiaga, i le tulituliloa o Iesepela e fia fasioti ia te ia. Lea la ua toe faapupula e le Atua elia i le matautia ma le silisiliese o mea e mafai i lona mana, e sao ai ma lia tagata ma mea ua na ia faia. O le “...e le’i iai...” o le Atua i le matagi, le mafui’e ma le afi, o le faamanatu lea i le perofeta o loo “...iai..” le Atua i totonu o ia i taimi uma. E le seiloga e galulu le lalolagi i ni faaaliga tetele e faia e le Alii, auā o le Atua e iai i mea uma, na te le

(faaauau itulau 7)

PEPA FONOTELE MALUA 2019

“Faaaliga o le Mana o le Silisiliese” **Revealing the Power of the Most High**

tu’ulafoaiina fo’i ona tagata faatuatua. Ua avatu e lenei faaaliga le maunoina iā Elia, o lo o iai le Atua faatasi ma ia, ma e tumau pea le pule aoao a le Atua ma lona silisiliese i mea uma na ia fai. E manatu foi o se feau tāua lea mo le Ekalesia tauala atu i lenei sailiga.

1. E pule lava le Atua i ala e faaali mai ai lona mamalu ma lona silisiliese.
2. Ia manatua o loo iai i le Atua i totonu o i tatou i taimi uma, na te le tuuna foi i tatou.

UPU FAAIU:

Ou te faapea atu; le mamalu e o le Ekalesia, ua luluina lava faavae o lou faatuatua i lenei vaitau. Ua lamatia fo’i lo tatou maopoopoga faale-Ekalesia EFKS i lo tatou va nonofo ai ma le lalolagi o mea matautia ma le malolosi, e tosina gofie iai le vaai ma lagona. O mea uiga ese nei ua faamatauina lo tatou ola saili ma tumau i le Alii. Ao le feau faamanatu o lenei taumafaiga, ia tatou loto tetele o loo soifua lo tatou Alii, o le e faali mai i lana Ekalesia i lana pule alofa

ma lana pule agalelei, i faaaliga o lona mana silisiliese e tusa ma lona lava finagalo. O le Atua lea ua manumalo i mea uma, e ala i le toetu manumalo o lo tatou Alii Faaola. Ua pule aoao foi o ia mai lava i le amataga e oo i le faavavau, faavavau lava.

Ia manuia le fonotele o le 2019.

Saunia:

Rev. Faauuga Mata’utia (FT)

EFKS Tulaele

Matagaluega Faleata.

O LE TALITONU KERISIANO

Tatou te ofo uma e faitau i nisi o upu loto maulalo a le aposetolo o Paulo, e faaaliga ai lona faatauavaa ma lona le tatau ai ona valaauina o se aposetolo, ma ina o i ai o ia i le fale puipui, na tusia ai nei upu - **“Ou te mafaia mea uma lava i le faamalosi mai o Keriso ia te a’u.”** [Filipi 4:13] O le upu malosi lava a le aposetolo o i ai iinei o le **“Ou te mafaia”** o se avanoa tele lenei o le malosi ua oo atu i le tagata, po o le faapea foi o le vaega lea a le tagata e tatau ona i ai. E mafai foi ona faapuina faapenei le manatu o Paulo. “A ou mafaufau ia Keriso ua ou lagona ou te mafaia ona fai so o se mea ona o le malosi ua Ia tuuina mai ia te a’u.”

A talia atoatoa e o tatou mafaufau lenei manatu **“ou te mafaia”** o lo

tatou tatalaina lea o le faitotoa i le Atua. A e afai tatou te faapea **“ou te lē mafaia,”** o lo tatou tapunia lea o le faitotoa i luma o fofoga o le Atua ma o lo tatou pupuniina foi lea o le tafea mai o lona malosi tatou mafai ai, ma o le iuga o le tatou agai lea ina faalautagitagi ma i’u ai lava ina oti mo’i.

Poo a lava faigata, ‘aua le fefe o loo faaloaloa mai aao o le Faavavau ia i latou uma o e faapea atu **“Ou te mafaia.”**

I le tasi foi itu e mafai ona tatou manatu i ai i nei upu a le aposetolo **“ou te mafai”** ona tatala lea faitotoa a **“ou te lē mafai”** ona toe tapuni. A tapuni faapefea le faitotoa e ulufale mai ai Keriso. **“Ou te mafaia mea uma i le faamalosi mai o Keriso ia te a’u”**

o se faitotoa e tatau ona matala pea mo le tafe atu o le malosi.

O lo tatou olaga masalosalo ma le fefe, o o tatou uiga faaoleole ma le faalata, o le manatu faapito ia i tatou lava ma le fiamalosi, ua faiaina so’o ai tatou uma, ma ua tatou mapu ai lava i lenei upu e pei o se vailepa **“ou te le mafaia.”** Ua maua ai i le ma’i lea o le paie ma le faapalapala, ua tele le mau mea, ou te le mafaia.

A o le kerisiano moni ua na talitonu e le na o ia, o i ai Aao o le Faavavau e fesoasoani ia te ia. O lona faapea atu **“ou te mafaia.”** Ua na talitonu auā – E mafaia e le Atua - e finagalo ai le Atua – ma e faia lava e le Atua.

(Mai le Sulu Samoa 1972)

“FETU’U TU’UNAI MUNIAO”

Tusi Faitau: Ioane 2:10b...

“...a ua tu’u o oe le uaina lelei, ua o’o mai i lenei ituaso.”

Tasi lea Masani fa’a-Iutaia, pe a fai ni faiga ‘ai po’o ni Tausama’aga po’o se fiafia foi, pei o le Fa’aipoipoga i Kana i Kalilaia. A fa’asafua le uaina, e muamua tufa le uaina lelei i le au vala’aulia. E ‘onana loa tagata i le uaina lelei pe uma fo’i, ona tu’u loa lea ae fa’aalu le uaina leaga. (E le se uaina o’ona...) i le manatu e leai se isi o toe iloa le eseese o uaina. Pei a ole masani a tatou, e maua loa numela, e le toe iloa le tuaoi ole lelei ma le leaga. Peita’i o le meafou lea ua tupu i le fa’aipoipoga i Kana i Kalilaia, ua uma le uaina lelei ua fiafia iai tagata, ae au mai le isi uaina, o le uaina e sili atu ona lelei.

O le ala lea o le te’i ole Pule ole Tausama’aga, i le tofo atu i le vai ua liua ma uaina, ua sili lona tofolelei, nai lo le uaina na muamua. E le ole uaina la le mea taua, a’o le mea na sau ai le uaina. (manatua ole masani lea a Ioane, na te fa’amatalaina mea fa’atauva’a, (uaina) e fa’aioamai ai meataua, e fa’amatala meapapa’u e faaali mai ai mealoloto, e fa’amatala mea ua masani ai tagata Iutaia e fa’aioa mai ai le lelei ma le matagofie o Iesu Keriso. O le Uaina lelei lea, mo le lalolagi ua tumu i mea le lelei. O le feau lea o lo’o tau fa’ama’alo mai e Ioane. O le Afio mai o Iesu Keriso, ina sei toe liliuina ma toe

fuatai le lalolagi ua numia i le agasala. O le uaina sa tataua ona fa’amuamua, a ua fa’amulimuli e tagata, o le uaina sa tataua ona fiafia iai le tagata, a ua le amanaia e le toatele.

O le uiga lea o le manatu o le Tusitala, silasila foi e le o malamalama le Pule o le tausama’aga i le mea e sau ai le uaina lelei lea. E liliu e Iesu le vai e fai ma uaina, ae ave le fa’afetai, ave ile fa’atoafaiava. (alii fa’aipoipo). Peita’i e le taua foi lea i le manatu o Ioane, pau le mea ua fia aumai o le liliuina ole suavai e avea ma uaina e sili ona lelei, i le va’ai a le so’o na latalata i le Ali’i. (le so’o alofaina) o le Afio mai o Iesu Keriso, ina sei toe fanaufouina, toe fufulu ma fa’amama le lalolagi ua numia ma fili fue ai le agasala.

Silasila fo’i, a faitau seia uma le mataupu, na uma loa le ulua’i fa’aioaga lenei i Kana i Kalilaia, soso’o loa ma le fa’amatalaina e Ioane ole fa’amamaina ole malumalu i Ierusalem. Aemaise o Afioaga ale Ali’i... **“Ina lepeti ia o lenei malumalu, ona ou toe faia lea i aso e tolu”** O se saunoaga na matua vevesi ai Iutaia, ma tu’u fesili... **“E 46 tausaga o fai le malumalu, e fa’afefea ona e toe faia i aso e tolu?”** O le tauaso fa’aleagaga ma loto e mata’ua. E le ole malumalu na faia e lima, a’o lo’o saunoa le Ali’i i Lona Maliu ma Lona Toe Tu mai i le aso tolu, ina ia magalo le lalolagi e aofia ai ma Iutaia le talitonu.

O lona uiga, o le liliuina o le vai e avea ma uaina e sili ona matagofie i le tofo, ole ata lena ole suamalie, malase ma lololo o manuia o Keriso i lo tatou ola. O Ia o lo tatou fanaufouina, o Ia o lo tatou fuata’i nai le Ola Fa’avavau.

O le upu moni e le mafai ona fa’afitia, e leai lava se tasi na te mafai ona fesuiaina o tatou olaga mataga ma le to’ilalo, e na o le Mana o le Ali’i Toetu (Le uaina Fou). Ia manatua le mea lenei, o le ‘anava lea a le fili e le moe, ma e le fa’atamala i ona faiva. Na te fa’aaoga o tatou vaivaiga, aemaise le lima vaivai, e tafale ai o tatou loto, ina ia le fealofani ma ia tatou ola fa’avaivai.

O le Pese 180 a le EFKS... **“E lelei mea uma e iai Iesu. A fa’atasi ma ia ou te filemu.”**) O lona uiga, soo se mea, se aiga, se nu’u, se Atunu’u, se Malo aemaise se Aulotu ae lotolotoi ai Keriso, e le gata e iai le fiafia, le fealofani, le fetausia’i, ma le fefa’amagaloai, ae iai fa’atasi ma manuia o le toe tu. Pese a le Aoga Aso Sa... **“A iai Iesu i se Aiga, ose aiga fiafia”**. A iai i se loto, e le gata o lea fiafia lena loto ma saoloto, ae le toe leaga ma eleelea fua i mealelei o lo’o fai e isi tagata. A iai i se fa’atofalaiga, e fa’asoa ai le pule, o le a lilifa i le amiotonu, ma le alofa le Tofa e manuia ai tagata, ae a iai foi i le tu’ualalo ma le fautua a Tinā, oka se lalolagi ina matagofie ma lelei. Ae a aunoa loa i tatou ma Keriso, ona a lea? Sa’o loa le lo’omatua o lo matou nu’u. **“We are nothing”**.

Tusia:

**Keneti Leaupepetele. T. (F.S.)
EFKS Savaia & Tafagamanu-
Uta.**

“FETU’U TU’UNAI MUNIAO”

Tala mo Ulugalii Talavou

Amata lelei le mafutaga a le isi ulugalii. O Alofa le tinā a o le tamaloa o se afioaga o Savaii. Fealofani ma fialia; e toalua si la fanau. E faigaluega le tamaloa, ae nofo le fafine ile fale ma vaai nai tamaiti. E toaaga i le lotu ma taumafai si a la matafale; ae lei faia so la tofi tiakono. O le mea ua tupu ua leiloa foi po ai le faitatala ua limua si fafine i lona toalua; ua tupu ai le masalosalo o le tamaloa. Fiu si fafine e tau faato’ato’a le ita ma le fuā o le tamaloa a ua le mafai lava ua masalosalo vale lava, e iai se faanunumi a lona toalua.

O le upu moni lava. O le fua valea ma le masalosalo vale, o isi ia aupega malolosi a le tiapolo e lepeti ai mafutaga faale-ulugalii. Aemaise lava le autalavou. O le isi aso na alu le tamaloa e faigaluega, ae ta le 10 i le taeao, ae toe sau i le fale. O le mafaufau o le tamaloa, sei toe sau lava e siaki mai lona toalua pe moni lava ona masalosalo. Ua uma ona tautala iai le fafine, e sesē ma e lē sao tala a tagata na e fai ia te ia. O le tiapolo lena e taumafai e faaleaga le la aiga. Ae le mafai lava le tamaloa.

Na ona tu lava o le taavale, vaai atu i le faleoo o la e pulolou mai

tagata i le fala. Savali loa iai; e oo atu e toalua tagata la e pulolou i le fala. Faapea loa mafaufauga o le tamaloa.. “Sao kele lau make; lea la ua maua...” E lei toe faatali le tamaloa ae ua sasa loa i le laau tagata ia e pulolou i le fala.

Na ona uma lava savali loa i le fale ae tei e alu atu i le fale, o la e pisi mai lona toalua i le umukuka; Fesili loa. “O a na mea e fai?” ae tali mai le fafine “O lea e kope le meaai, ua ou ke’i i le kuku mai o le koeaiga ma le lo’omakua mai Savaii, ga omai i le va’a usu. Ga ua fai atu iai e o i le faleoo e savili e malolo ai, ae sei kope le meaai. E a?

Te’i le fafine i le tagi aueue o lona toalua ma toe sau i le atoa i fafo, auā o ona matua lea na pulolou i le fala i le faleoo. Sao a le upu “Ua toe tagi fua vi, a ua i le vaa o Eneli” Pei lava ona fai atu o mailei a le fili e lepeti ma faaleaga ai mafutaga lelei a le tamā ma le tinā i totonu o le aiga. Ou te le sesē pe a ou fai atu ua tele aiga malepelepe ma ulugalii tete’a. Ae lei atoa se lima tausaga. Aisea? O le tuinanau ua le faamalieina, aemaise le oa ma le tamaoiga ua na faatauasoina mata o le alofa. O nisi ua matua tiai a le fanau ma le tautoga ae

matua faamaopo le tama’i faala’ila’i. Tagi talatala le isi tinā, fai mai o le tama a lona uso na avatu i Niu Sila e alofa ai, ae emo ane le ata ua aveolaina e lona toalua i Ausetalia, ae tiai o ia ma le fanau i Niu Sila. Fai mai le isi toeaina: “*Sole, kua kou ula kele*”

O le fautuaga a le Fetu’utu’una’i muniao; aemaise lava le au talavou. O le tautoga i luma o le Atua, i le aso o le “I do” e le ni konekalate e tai tolu tausaga ma saina e toe faafou ai e pei o C.E.O. E le pei o Konekalate a tama lakapi e tai 3-5 tausaga ma toe tasui ma toe faafou, auā e fua i le tupe. Leai! Le au uso e, o le “**I do**” a le kerisiano, o le olaga atoa e “**For Life**”

Leaga o upu o le tautoga e faapea... “*Se ia oo ina tatalaina lenei feagaiga i le oti*” o le polokalame ia e na ona tuualalo ma faufautua, ae pule lava le tama a le loomatua...

Tusia:

Rev. Keneti Leaupepetele (FS)
EFKS Savaia & Tafagamanu-uta

QUOTE:

(John 3:17)

“For God did not send his son into the world to condemn the world, but to save the world through him”

ARETO MO LE AGAGA

IA E FAATOILALOINA LE LEAGA I LE LELEI.

Ao alu atu le malaga a le tasi alii e tietie i lana solofanua, sa fa'afuasei lava ona taofia o ia e ni tagata faomea ma faapea atu ia te ia: "Aumai uma mea tāua ma oloa o ia te oe ia i matou, ia vave, a leai o lou ola." Na tago ifo loa le alii i lana taga, ua fefe lava, ua tuu atu lana ato o iai uma ana tupe. Sa toe fesili atu le ta'ita'i o ē faomea: "O au tupe uma nei ua e tu'uina mai ia i matou?" "Toe." O le tali atu lēna a lea alii. Ona tuua loa lea o le alii e ia tagata ae ō.

Sa toe tau ane le lima o le alii i le tagata o lona pelaue o loo patupatu ai se mea, ona ia toe manatuaina

ai lea o lana fasi auro lea na teu ai iina. Sa toe oso faavave loa i lana solofanua ma tuliloa atu le au faomea. Sa ia faapea atu ia te i latou, "O le upu na ou fai atu ai ia te outou, e le sao lea, ona ua faafuaseia tele au, o lea sa ou le manatuaina ai lau fasi auro sa teu i totonu o lou ofu, o lea ua ou sau ai e avatu ma lea mea ia te outou, o le auro lēna." O lea na ofo ai le alii i lēna itula, ona ua leai lava se isi o le au faomea e toe tautala, e leai foi se tasi na tago atu e aumai le fasi auro mai le alii.

Ua mavae se taimi umi lava, ona toe tago ifo lea o le taitai i lona ofu

ua ave ane le ato tupe a le alii ma toe faafoi atu ia te ia faatasi ma lana fasi auro. Na o ane le au faomea uma ma sii le alii i luga o lana solofanua, ma ua latou aioi atu i ai ina ia faamagaloina i latou, ma ia faamanuia mai ia te ia i latou.

IOE, UA MANUMALO LE LELEI I LE LEAGA. O la le aposetolo o Paulo: "*Aua ne'i faatoilaloina oe i le leaga, a ia e faatoilaloina le leaga i le lelei.*" (Roma 12:21).

Tusia:

Iosefa Atapana Uilelea (FT)

EFKS Lotofaga

Matagaluega Lotofaga-Lepa-Aleipata.

“O LE TAGATA KERISIANO MONI”

O le a ea lēnei mea ua tatou taua o le tagata Kerisiano moni?

Po'o le tagata poto ea? E leai.

Po'o le tagata mamalu ea? E leai.

Po'o le tagata tamaoaiga ea? E leai.

Po'o le tagata tino maloloina ea? E leai.

Po'o le tagata mau tofiga ea? E leai.

A'o le a ea la?

“O le alofa atu i le lua te tuaoi, e pei o ia lava ia te ia.”

Tusia: Iosefa Atapana Uilelea (FT)

EFKS Lotofaga,

Aleipata



LISI O A'OA'O FA'AU'U MO LE TOFI FAIFEAU

SAMOA

FONO TELE 2019



Nisi nei o i latou sa fa'au'u o latou tofi Faifeau Samoa i le Aso Toonai ,18 Me 2019, i le Fono Tele i Malua. Ua ausia e i latou le isi laasaga ole ola tautua ma le talaiina o le finagalo o le Atua, i nuu ma Ekalesia. Sa faatumulia lea aso i aiga,uo ma e masani e molimaquina lea aso matagofie ua faasino ia i latou ua taua o Faifeau Samoa.

	<u>SUAFA</u>	<u>FALETUA</u>	<u>MATAGALUEGA</u>
1	AMOSASILIPA	Mere	AANA
2	ERONISITANILEI	Litia	FALEATA
3	FAAFETAIAIAVĀ	Luse	FITI (VITORIA)
4	FILEMONICRAWLEY	Alofa	KOLISO MALUA
5	PIULAPULA	Faimeatonu	ITUOTANE
6	SATALASA'U	Rina	AANA
7	SIMONANE	Deanne	KUINISELANI I SAUTE
8	SOTIAKARISATISONE ROMA	Vanu	FAASALELEAGA
9	TAULOTOGA VILIAMU	Sago	ITUOTANE
10	TAVITAEVAGELIA	Lei	KUINISELANI
11	TIMOTEO TAPELU	Ilasa	MALUA
12	VAAITUA	Niukini	AANA
13	VAASAUMAMAO LAFAAUA SI'A	Elizabeth	FALEALILI-SAFATA-SIUMU



ITULAU MO TUPULAGA TALAVOU

“IA E FILIFILI LE OLA”

Teuteronome 30:19 “*Ou te valaau i le lagi ma le lalolagi i le aso nei e fai ma molimau ia te outou, ua ou tuuina atu i ou luma o le ola ma le oti, o le manuia ma le malaia, o lenei ia e filifili i le ola ina ia ola ai oe atoa ma lau fanau.*”

Ua faailoa mai e le Tusi Paia, e filifili le tagata poto le ola po’o le oti, o le manuia po’o le malaia fo’i, auauna i le Alii pe leai. Lau filifiliga sa’oloto e te manuia ai, po’o le malaia ai fo’i. Finagalo le Atua ina ia fialia lana tagata o iai lona

faatusa. Ao o oe ma au e faia le filifiliga tatau ma le lelei. Afai e te manatu e te le auauna ma tautua i le Alii leaga e tele ai le gaosa o ou tiute ma alu ai lou tamaoiga ma taofiofi ai oe i lou sa’olotoga i le olaga fialia. Afai latou te manatua e auauna i le Alii ma maua ai manuia sili lena.

O le ola fialia ma le to’afilemu ma alofa i ou matua, lou aiga ma so’o se tasi V.20. Ina ia e alofa atu i le Alii lou Atua ma e faalogo i lona siufofoga ma ia e pipii atu ia te ia, auā o lou ola ia ma lē na te faafualoaina ou aso...” Afai e te

fia ola umi, ia faia lau filifiliga tatau ma le lelei mo oe. Filifili ia e auauna i le Alii, usitai ia te ia ma pipii ia te ia i aso uma ma le faamaoni. Ona e fialia ai lea auā e te mafaia.

Le Atua e, ou te faafetai atu ua e afio mai e aumai ia te a’u le ola i lenei aso ou te faia ai se mea lelei mo oe, usita’i ma tumau ia te oe.

Ua ou iloa nei: - O oe lo’u ola, ma faaumiumi ai aso o lo’u ola i le lalolagi, ma ou tautino atu ua ou fialia e talia le ola manuia ma le fialia ua e foai mai mo a’u i aso e tele.

Lau filifiliga e te manuia ai, o lau filifiliga fo’i e te malaia ai.

Tusia:

Solomona Tuatagaloa (FT)
Faifeau Toeaina Penisione Malolo

“AUA LE MANA’O TELE PE TUINANAU I MEA E TE LE MAUA”

Ia e ola ma talia ma le loto faafetai mea ua e maua i lea taimi i lea taimi. O le mana’o o le lagona masani o le tagata i taimi uma. A mana’o tele loa ma tuinanau le loto i mea e te le maua ona e afaina lea, gaoui ai, talepe fale, fasi tagata ai ma tauvalea ai oe, ou matua ma lou aiga. Tele tupulaga e falepuipui ona o le mana’o i mea a isi ma amio latou te faia. Taumafai e fai au teuga e faatusatusa i isi, ona e taumafai ai lava lea ia maua faapei oe o i latou fo’i. Ae leai, fai pea le mea e te masani ai o le ola i se olaga taugofie ma matagofie. Auā

e te fiu lava e ola faafoliga i le isi tagata e le mafai, afai o oe o Sina e te fiu e teu pei o Sieni e le tutusa lava, o oe lava o Sina afai o le a tutusa teuga o lua ulu, ae le tutusa lua mata ma lua gutu. Aia ola pea oe o Sina ma Sina pei lava na fai ai oe e le Atua. Pau lava lea o le mea e tutusa ai tagata uma, o le ola na faia ai i tatou e le Atua o lona faatusa.

E manava Sina e manava foi Sieni i le ea, fia ai, fia moe e tutusa ai tagata uma lava. Aua nei faatigaina oe e le mana’o pea, e

mataga ai foi i isi taimi, e te aisi ai, ma e mata moe ai, ma e ma’i ai foi. E leai sau feau pe a e ulaula pule oe. Ae o le faaauau o le mataupu i le mana’o tele. Ae sili ai, ‘aua le faata’ita’i i iai, ola pea i le olaga taugofie ma le matagofie. **Faataoto 22:1-2** “Ia sili le mana’o ina ia taulelei, i le mana’o i le oloa e tele ma le agalelei, ia sili le mana’o i lea i lo le ario ma le auro, (2) O le mauo’a ma le mativa la te fetai ai na faia i laua uma e le Atua.

Tusia:

Solomona Tuatagaloa(FT)
Faifeau Toeaina Penisione Malolo

ITULAU MO TUPULAGA TALAVOU

E MANATUA PEA, E LE GALO.

Tele le suiga o le olaga i lenei vaiata. Na amata mai lava i mea pue ata e le lanu, seia vaaia ata ua lanu, ma oo mai i lenei vaega o le olaga ua pu'e i telefoni ae lanu foi. Ua matua faigofie ona maua lou ata i so'o se taimi. Ao le fesili o le a le umi e te manatua ai; afai e te fai mai e le galo, ae pe afai e galo i le fale pe le iloa lau telefoni ma e matua fiafia i le mea o e iai, e te manatua? Ao le fautuaga, tago e pu'e le ata o ou matua, le fale o nonofo ai, le umukuka, le mea o momoe ai i lou "Fatu" e matua le galo ia te oe le ata manino o na mea uma. Po fea lava e te iai ma mea e te faia e te manatua pea, auā la e i totonu o lou fatu ma lou

loto. O le mea pue ata sili lena e te manatua ai ou matua ma lou aiga i le tulaga o iai, e te alofa pea iai ma e taumafai e fai sau fesoasoani lelei mo lau, ma lou aiga e faalelei ai ni mea o faaletonu.

Tupulaga e, aua le tosina gofie lou lotu ma lau vaai i uiga ma amio a isi tupulaga. Aua e te faataitai fua iai ae ola lava oe, lou maumau o oe lava e te lelei ai pe a e faalagolago ma faatuatua ia Keriso e faatonutonuina ma taitai oe i mea lelei e te ola ai.

Faataoto 4:20-26

"Lou atalii e, ia e faalogo mai i au upu, ia uai mai ou taliga i mea ou te fai atu ai

V.21 Aua ne'i tea ese ia mea i ou mata, ia e tausi iai totonu o lou lotu

(V.22) Auā o ia mea o le ola lea i e ua maua, ma le mea e malolo ai o latou tino uma.

V.23 Ia sili ona leoleoina o lou lotu, i le leoleoina o mea uma auā e tupu mai ai le amio.

V.24. Tuu ese ia te oe le gutu faapiopio ma laugutu faatuiese, ia mamao ia iā te oe.

V.25 Ia vaai sa'o ou mata i ou luma ma ou laumata ia faasagatonu ia i ou luma.

V.26 Ia mafaufau i le ala o ou vae, ona faatumauina ai lea o ou ala uma.

V.27 Aua nei afe i le itu taumatau poo le itu tauagavale, ia alo ese ou vae i le leaga.

Tusia:

Solomona Tuatagaloa (FT)

Faifeau Toeaina Penisione Malolo.

ARETO MO LE FANAU

1. OLE MAUGA O MARESA. **(Galuega 17:1-34)**

O Paulo ma Sila sa lauga tala'i i nisi nuu o Maketonia. E ui lava o tagata Iutaia sa auai i le ekalesia i ia nuu, a o nisi foi o e na liliu ane i le ekalesia o tagata o Nuu Ese po o tagata o Eleni. Peitai i nei nuu taitasi sa i ai faafitauli sa feagai ai ma Paulo ma Sila. O i latou lava sa le talitonu i le talaiga, o i latou ia sa faatupu faalavelave. O i latou

ia sa latou faasese i tagata ae maise o ta'ita'i o le malo. Na fai atu i latou ia, O Paulo ma Sila o loo la faia se fouvale tele i le malo o Roma, i lo la talaiina o Iesu o se tupu fou. O Maketonia, e le o se nuu e maua ai se saogalemu mo le tala'i atu i ai o le talalelei ia Iesu.

Na malaga Paulo i Atenai, o se aai tele lava lea i Eleni. O tagata o lena aai, o ni tagata popoto tele. o le tele lava o o latou taimi e talanoa ai i mataupu tau le poto

atoa ma tapuaiga ma o iina latou te iloa ai le tele o mataupu eeseese. Latou te ifo foi i le toatele o atua. E faapea se tala e sili atu ona tele tupua o atua i Atenai i lo tagata o Atenai. Sa i ai iina se tupua "i le atua e le iloa."

O le mauga o Maresa, o se tasi lea o nofoaga e potopoto ai tagata o Atenai e talanoa ai i mataupu tau lotu ma tapuaiga. Sa fai atu i latou le tala e uiga i lana lotu atoa ma lona Atua. O lea na tau atu ai e

ARETO MO LE FANAU

Paulo ia i latou le tala e uiga ia Iesu na toetu mai atoa ma Lona Agaga Paia na foai mai ia i latou.

E toatele lava tagata sa i ai iina, sa latou talie ia Paulo. A o isi sa fai atu ia te ia ina ia latou toe talanoa i se aso ae peitai, e toaitiiti tele i latou mai Atenai na talitonu.

Mafaufau Atili:

Ai se a na manatu ai tagata i Atenai e tatau ona i ai se tupua “o se atua e le iloa? Aisea na le toatele ai nisi i lea aai e talitonu ia Iesu?

2. O PAULO I KORINITO (Galuega 18:1-22)

Na alu Paulo mai Atenai i Korinito, o se tasi lea aai o Eleni. A o i ai o ia iina, sa feiloai ai o ia ma se ulugalii o Akula ma Pisila, ma o i laua ia na avea ma uo a Paulo. O i laua o ni tagata e fai fale ie, e pei foi o Paulo, ma ua latou galulue ai i lea faiva. Ua oo i le Aso Sa, ona alu ai lea o Paulo ua lauga atu ai i le sunako i tagata Iutaia Peitai, e le i manuia lea tulaga. O lea na ia manatua ai e alu e lauga i tagata o Nuu Ese i le nuu.

I le ua tuputuu malie ae ai le ekalesia i Korinito. O le toatele o i latou nei i le ekalesia, o e sa ifo i tupua. A o iai Paulo i Korinito, sa maua ai e ia le isi faaaliga. Na fetalai mai le Atua ia Paulo i se miti e aua nei fefe o ia e tala’i atu le suafa o Iesu; aua e toatele ni ana uo i Korinito.

Na nofo ai Paulo i Korinito i le

tausaga e tasi ma le vaeluaga o le tausaga, a o le i toe foi atu o ia i Asia. Ona alu ai lea e toe asiasi i Ierusalem, a o le i toe talii atu o iai i Anetioka.

Mafaufau Pea:

Na faapefea ona maua e Paulo ni tupe e ola ai a o talai atu e ia le tala ia Iesu i tagata? Pe sa manaomia ea e ia ni tupe?

3. O PAULO I EFESO (Galuega 18:20-1)

Na malaga Pauloa i le atunuu o Kalatia mai Anetioka. Sa fiafia tagata i na nuu e faalogo i le tala ia Iesu, ma sa tausia lelei e i latou o Paulo. Toatele i latou na avea ma Kerisiano, ma e oo ane ina tuua e Paulo le atunuu, ua mautu le ekalesia iina.

E le i leva ona alu ese Paulo iina, ae o ane faiaoga Iutaia ua fai atu i tagata Kalatia, ia avea i latou o e ola faaIutaia, ona avea ai lea o i latou ma soo o Iesu. Sa le i iloa e tagata Kalatia o se mea pepelo lea mea; aua o lea ua avea i latou ma Kerisiano e ala i le faatuatua ia Iesu. O lea na tusia ai e Paulo se tusi umi ia i latou. Ua faali atu e ia, e le aoga ona ola faa-Iutaia i latou. O lea ua ola saoloto i latou e ala ia Iesu, ae le o le tulafono faa-Iutaia.

Ona oo loa lea o Paulo i Efeso. Sa i ai o ia iina muamua, ma ua nofo o ia i lenei taimi i Efeso e sili atu i lo le lua tausaga. Na avatu e le Atua ia Paulo le mana tele e faamalolo ai i mai.

Sa i ai i le aai o Efeso se malumalu

o le atua tamaitai o Tiana. Sa o ane tagata mai i itu eseese o le lalolagi e matamata i lenei malumalu. Sa faatauina e tagata i lea malumalu o tupua auro ma siliva o Tiana e fai ma a latou suvania. O se tasi lea o ala o le tamaoaiga tele o Efeso.

O se tasi o tufuga fai tupua o Tiana, o le alii o Temetiu. O ia lea na fai atu i isi tufuga, o Paulo o loo lauga o ia e tetee ia Tiana, Afai e le taofia o ia, o le a mamate a latou pisinisi o lea na taufetuli atu ai i latou nei i le auala tele ma alalaga atu, “E sili lava Tiana o Efeso!” Ua faapea ona mulimuli atu i ai le toatele o i latou e ui ina e le o malaga. Mulimuli ane, ua faafilemuina lenei vevesi e se tasi taitai o le nuu, ona filemu ai lea. Na faapotopotoina uma e Paulo ona soo, ma ua alu atu ai o ia mulimuli ane i Maketonia.

Mafaufau Atili:

O le ifo i tupua i Efeso, o se pisinisi. Afai na nofo umi Paulo i Efeso, mata o le a le mea e tupu?

(Mai le Sulu Iuni 2000)

Quote:

Luke 6:27

“But to you who are listening I say: Love your enemies, do good to those who hate you.”

O E UA FAI'ILAGI LE FOLAUGA

MATAOLOA PEPE MANU LEMALU

07 Me 1950 - 27 Me 2019

O le tinā ia Mataoaloa Pepe Manu Lemalu o le faletua o le Tiakono e mai le nuu o Salelesi ma Matautu-uta, sa malaga mai i Niu Sila ma faaiipoipo atu ia Lauulu Fialauia Peoalii Lemalu o Lefaga ma ua 41 tausaga o le mafutaga ae faamutaina loa i le oti. E toa 4 le fanau ae 13 fanau a le la fanau. O le faamanatuina o le 60 tausaga o Mataoaloa i le tausaga 2010, o le ma aso fanau muamua lena i totonu o le Aulotu leni. Ao malosi a lena o Mataoaloa e auai i soo se sauniga aemaise o mea fai a le Mafutaga a Tinā.

O le taotoga muamua lava o Mataoaloa i le aso 5/7/2013 na iloa ai ua gasegase. Na ou faia ai le la faamanatuga ma Lauulu i le falemai Middlemore, ma na amata mai ai lava i le Aso Sa muamua lea o Iulai 2013 ona o ma tausavali e fai le faamanatuga a Mataoaloa i lona maota ao lei amataina le sauniga a le Aulotu seia oo mai i le faamanatuga o Me 2019, o le faamanatuga mulimuli lea a Mataoaloa, o le feiloaiga mulimuli foi lea ma si a ma matua tausi.

Sa faitonu ai lava ma Mataoaloa e sau e usu sana pese i le aso o tinā i le Aso Sa e sosoo ai ma matou faamavae ai ae lei alu le matou usugafono peitai, ua le

malosi o le ala lea na le auai mai ai. O le Aso Sa o Tinā i le 2016 o lana faamalosiua ma lana pese mulimuli lea i luma o le matou aulotu.

Poo le a le tigaina o Mataoaloa ae taunuu atu lava i taeao o Aso Sa o le faamanatuga ua leva ona sauni mai ma ona laei papae. O le tinā e faatalitali i le Alii, e fia ai ma fia inu i le faaolataga e ala i le areto ma le uaina o le faamanatuga a Iesu.

Na po lana vaai mo ni nai masina o le tausaga na tea nei, ae na faia lona taotoga ma toe faafoisia lana silasila i le 3 masina talu ai; o le isi lea vavega na faia e le Atua i le soifua o leni tinā.

E le o maua le aso na faatiakono ai laua ma le tamā ia Lauulu, ae lilifā le sailiga o le tau faaiuiu o le tausaga 2008. E lei lagona lava lona leo i tonu fai a leni Auotu, ae tautua matalilo. E taumafai lava ina ia fai uma ana mea fai mo le mafutaga a tinā e oo lava i le Faamati.

Sa unai e leni tinā fanau a lana fanau e o mai i le A'oga Aso Sa, ae na ma'i loa Mataoaloa, amata loa ona faiaga tamaiti. Talosia e mafai e lana fanau ona faaauau le galuega faatinā lelei o Mataoaloa o le unai mai o fanau.

O le afiafi o le aso faraile 31 Me 2019 na ave ai i tua lona tino maluu mo le maota o lana fanau i Mangere. Na faia ai lona Family Service i le afiafi o le Aso Sa 2 Me 2019; sa faitau Tusi Paia ia Lauava Pala Me Fale (AF) ao Tuiloma Rocky Tuigamala (AF) sa tatalo, o au sa ta'ita'ina le sauniga

ma fai le upu faamafanafana, ae sa molimau le tamā ia Lauulu ma lona tuafafine faatasi ai ma faifeau a le aiga sa auai.

O le taeao i le 10am na faia ai ona toe sauniga i le fale maluu o Lugaliga; o Ata Lemana (AM) na ia momoli atu lona sa i totonu, o Lauava Pala Me Fale (AF) na faia le tatalo ao Tuiloma Rocky Tuigamala (AF) na faitauina le Tusi Paia. O ē na molimau o Manu Leogaotupu Manu, Vaisola Mary Tuimauga ma le tamā ia Lauulu Peoalii ao au sa faia lona molimau faaleagaga ma le upu faamafanafana. Sa usuina foi le pese a le fanau a fanau. Sa ou ta'ita'ina lona toe sauniga i luga o lona tu'ugamau i le fanua maluu i Papatoetoe.

O Mataoaloa e faamatalaina e foliga i oloa a le Atua, auā o se tinā tauivi, mataalofa, tausaaafia, tausaaiga ma faaaloalo. E agamalie ma finau i le fiaola, ae paga lea ua valaau le Atua foi atu ua iu lana tauiviga. Talofa e, ua fuli mai le tua o le isi matua tausi o leni Aulotu. Ia manuia lau malaga Mataoaloa.

**Tone Leituala (FS)
EFKS Mangere Bridge
Pulega – Maugakiekie
Matagaluega – Aukilani.**

SEU STEWART

BAKER

20 Aperila 1937 - 28 Setema 2018

“Ua ou tau le taua lelei, ua i'u ia te a'u le tausinioga, ua ou taofimau i le faatuatua (2 Timoteo 4:7)

(faaauau itulau 16)

O E UA FAI'ILAGI LE FOLAUGA




**MATAOLOA
PEPE MANU
LEMALU**

O Seu o se tasi o tiakono matua o le Ekalesia i Ketesemane. O se tasi o toe ulutaia o lenei Ekalesia i Ketesemane. O lē sa faavaeina le Ekalesia e oo mai i lenei taimi.

Na soifua mai Seu Baker i lona aiga i Solosolo Anoama'a i le aso 20 Aperila 1937, ae ua famanavaina e le Atua ana galuega i le aso 28 Setema 2018. Ua atoa ai le 81 tausaga 5 masina ma aso 8 o lona soifua.

Sa faaipoipo atu i le tinā ia Lauifi Baker i le 1977. Na faatiakonoina i le 1978 e le Susuga Toeaina ia Popo Su'a (FT) i le EFKS Porirua.

E to'asefulu lua o la alo, e 2 teine ma alii e to'asefulu. E 15 fanau a ana fanau, ae to'a lua fanau a fanau a ana fanau.



**SEU STEWART
BAKER**

O se tamā e molimauina lona soifua finau mo le manuia o lona aiga faapea le galuega a le Atua. O se tiakono foi e fiafia i lona valaauina. E fiafia i Aufaipese, Aulavou ma Tofiga faapea potopotoga a le aulotu.

Sa ou ta'ita'i i lona sauniga faaleaiga, Susuga toeaina ia Aufaga Faafia (FT) sa saunia le upu faamafanafana, Susuga Nove Vailaau (FS) sa saunia talosaga. O le Susuga Toeaina Tui Sopoaga o le EFKT sa fofogaina Afioaga paia a le Atua.

O ona toe sauniga, Sa ta'ita'i le Susuga toeaina a le Pulega Aufaga Faafia (FT) ma saunia talosaga. O Nove Vailaau FS sa saunia le lauga. Sa ou faaulufale le sa o le tamā ma molimau i lona soifua auauna i le Atua. Sa molimau le

"FAAMALOSI"

2 TIMOTEO 2:15

**Ia e taumafai ina
ia avea oe ma le ua
fiafia mai i ai le
Atua, o le
faigaluega e leai se
mea e ma ai, na te
tala'itonuina le
upu moni.**



tinā ia Lauifi i le la mafutaga ma le tamā.

Sa faai'uina ona toe sauniga i lona oliolisaga tumau i Whenua Tapu, Porirua ma fa'amavae atu i le tamā ia Seu Baker i le pese a le Aukerisiano..Talofa uso, tofaina oe, tofa...

Manuia le malaga Seu Baker.

“Auā ua ou tau le taua lelei, ua iu ia te a'u le tausinioga, ua ou taofi mau i le faatuatua.

**Saunia:
Kuatemane Ulutui (FS)
EFKS Ketesemane
Porirua
Niu Sila.**

